

Trece un pida di historia pa museo.

Ban contribui cu proyecto di Museo Historico Arubano

ORANJESTAD (AAN) -- Ayera atardi a tuma lugar un conferencia di prensa na Fort Zoutman, unda cu Museo Historico Arubano a anuncia su proyecto pa un museo permanente di antigüedad, pa cual nan mester e contribucion di nos comunidad. Diadomingo 24 di februari aki, di 10'or di mainta pa 4'or di atardi, lo tin un actividad special na Museo Historico Arubano, na Fort Zoutman. Ya ta pa varios luna cu un grupo di trabao ta trahando riba un exposicion permanente nobo pa e museo aki. E

grupo ta consisti di señor Karel Goedgedrag y señora Helen Lampe di e museo mes, Drs. Aluc Alofs y Kees de Jongh, docentenan di Instituto Pedagogico Arubano (IPA), Drs. Raymundo Dijkhoff y Mr. Arminda Ruiz Bsc di Museo Arqueologico hunto cu señora Gloria Croes di Instituto di Cultura. Pa haci e parti di diseño di e exposicion a acerca señor Leo Helms di Museo Kura Hulanda di Curacao. Coordinacion di trabaonan tecnico ta den man di señor Earon Mathew.

A traha riba e plan di e contenido di e exposicion cu lo enfoca riba e periodo prome cu yegada di e refineria Lago na 1924. E tres salanan di e museo lo trata un resumen di prehistoria te historia moderno; e bida di ciudad y e bida den cunucu. Topiconan cu lo resalta ta forma di bida, entre otro: arquitectura; economia, entre otro: comercio, agricultura, pesca, artesanía; educacion y expresionnan folklorico. Pa ilustra e informacion na un manera visualmente atractivo a cuminsa pa haci un inven-

tario di e coleccion di Museo Historico. Un gran cantidad di obheto y artefactonan dona na e museo den transcurso di añanan lo worde usa den e exposicion nobo. Sinembargo, ta sinti e necesidad pa pidi publico en general pa aporta na e coleccion aki. Riba diadomingo 24 di februari lo invita tur esnan cu por tin obheto, potret, documento, of algo otro cu ta conta un tiki di historia di nos pais. Preferencia di e grupo di trabao ta by na obhetonan cu ta di e periodo prome cu 1950, pero publico ta liber pa trece

obhetonan cu den nan concepto lo por ta interesante pa e futuro exposicion permanente di Museo Historico.

Personanan cu trece obhetonan lo mester ta dispuesto pa duna esakinan den "bruikleen" na e coleccion di e museo. Mas cu claro tur obheto lo worde catalogiza na e momento ey y e persona lo haya un comprobante cu e tin un obheto den coleccion di museo.

Mester haci mencion di e hecho cu e proyecto di remodelacion den e exposicion di Museo Historico ta worde financia pa UNOCA. Ademas e ta conta cu sosten di Ministro di Cultura y di e grupo di trabao pa Museonan. Den transcurso di siman lo duna mas informacion tocante e actividad en cuestion.